

## 3 Jon

### Jon mij kisen nib ak ñu kil tikak

---

<sup>1</sup>Yad bin bi Jisas Kraiss nop niñ dipal okok kirop kod midebin. Nep bi niñep tep yad Gaias mij aul ñu kil tikebin. Yad nep midmagil yib lipin.

#### Gaias gi tep gak ak niñil, Jon miñ miñ yib gak

<sup>2</sup>Ñibemmam tep yad. Yad God nop sobok gil agebin, “Gaias nop kod midenimin, nop miñak tap alap ma ginimiñ, mid tep ginimiñ,” agebin. Yad nipin, nak kaun nak nab adañ mid tep gipan. <sup>3</sup>Krais bin bi ai mam ognap siñaul apil, nak Jisas Kraiss minim niñid niñ di kilis gil, ageb rek nep gilig gi mideban, agelak ak, yad niñil miñ miñ yib gipin. <sup>4</sup>Ñi pai yad okok, Jisas Kraiss minim niñid ageb rek nep gipal, agenigal ak, yad miñ miñ yib ginigain.

<sup>5</sup>Ñibemmam tep yad. Yad nipin, Jisas Kraiss ageb rek nep gil, Kraiss bin bi ai mam ognap kirop per di tep yib gipan. Ai mam kariñ lim par kib okok nib ma nipan okok, kirop abramek dil, kod mid tep gipan. <sup>6</sup>Krais bin bi kirop nig gipan okok ognap apil, Kraiss bin bi cöc siñaul midebal kirop aglak, “Gaias Kraiss bin bi ne okok kirop midmagil yib lip,” aglak. Bin bi God wög gi ajpal nib okok di tep gi damil, kiri kariñ lim ke nib alap amnig genimel ak, tap tek dip ognap kirop ñinimin. Tap kirop ñinigan ak kiri dil, okok ajil, God nop wög gil, tap magil tau ñiñnigal. <sup>7</sup>Kiri Jisas Kraiss minim tep ak ag ñi ajlig gi, bin bi Kraiss nop ma niñ dipal okok kirop ag niñil, tap magil tap okok ma dipal. <sup>8</sup>Nib ak, cin bin bi tep nibak rek kirop di tep gil, tap ognap ñil, eip jim ñil, Jisas Kraiss minim niñid wög gi gon, am tep ginigab.

#### Daiotrepis gi timel gak

<sup>9</sup>Yad Kraiss bin bi midebim siñak nibep mij alap ñu kil tiknek ak pen bi Daiotrepis, bi kib midenim, agil, minim yad apin ak tib juil ma niñip. <sup>10</sup>Nib ak, yad midebim siñak amil, ne minim timel agil cinop

ag juip minim ak agnigain. Pen nibak nep mer; ne Krai bin bi ai mam God Minim ag ñi ajpal okok kirop ma dil, bin bi ognap ai mam okok kirop diplap okok, ne mer agil, nibi nig genigabim ak, kisen cöc aul ma onigabim, agip.

### **Demitrias gi tep gak**

<sup>11</sup>Ñibemmam tep yad. Bin bi ognap nag kibiñ timel ar ak kisen genimel, nak akñib rek ma ginimin. Pen bin bi ognap nag kibiñ tep ar ak kisen genimel, nak akñib rek ginimin. Bin bi nag kibiñ tep ar ak kisen gipal okok, God ñi pai ne midebal. Bin bi nag kibiñ timel ar ak kisen gipal okok, kiri God nop ma nival.

<sup>12</sup>Bin bi magilsek Demitrias nop niñil, bi tep, apal. Demitrias ne Jisas Krai minim niñid ak ageb rek gip ak me, ne bi tep ak miseñ lek nipin. Yad ak rek nep Demitrias ne bi tep ak, agebin. Nak nipan, yad minim tari apin ak minim niñid nep apin.

### **Minim magil dai ognap**

<sup>13</sup>Yad nep minim koñai nep ñu kil tikpnep ak pen mij ñig yig nep ma tiknigain. <sup>14-15</sup>Mañ mideb, yad ke amil, nep milik dai niñil, eip bisig midil minim agnigabir.

God nep kod midek, kapkap midenimin. Ñibemmam siñaul midobin nep, “Mideban?” agobin. Ñibemmam nak eip midebim okok kirop magilsek, “Jon nibep agip, ‘Midebim?’ agip,” agninin.